



Դանիել Վարուժան

Հասուն արտ

Արտըս ոսկո՛ւն է...

Նըման բոցերու

Տորենն է բրոնկեր՝

Առանց այրելու:

Արտըս ոսկո՛ւն է...

Երկինքն է կըրակ.

Հողը խորխուլած

Ծըղոտներուն տակ:

Արտըս ոսկո՛ւն է...

Քառաշար հասկեր

Քառաշար սաթով

Արև՛ են հագեր:

Արտըս ոսկո՛ւն է...

Բոռ, մեղու, պիծակ,

Քիստերուն մեջեն

Կ'անցնին զերդ փայլակ:

Արտըս ոսկո՛ւն է...

Մերթ կ'ելլեն, հովեն,

Դեղձանիկ մը, թի՛ն,

Ոսկեծուփ ծովեն:

Օրո՛ր, ոսկո՛ւն արտ,
Օ՛ր տուր, հասո՛ւն արտ,
Գամ ոսկիդ հնձեմ
Մանգաղով արծաթ: